




ՀՈԳԵՎՈՐ ԾԵՄԱՐԱՆԻ ՎԵՐԱԲԱՑՄԱՆ ՀԱՆԴԻՍՈՒԹՅՈՒՆԸ

Սույն թվականի սեպտեմբերի 14-ին, երեքշաբթի օրը, առավոտյան ժամը 11-ին, հոգևոր ճեմարանի հանդիսությունների դահլիճում, Մայր Աթոռի դիվանապետ և հոգևոր ճեմարանի վերատեսուչ Տ. Ներսես արքեպիսկոպոս Պողոսյանի բարձր նախագահությամբ, տեղի ունեցավ 1993—94 թթ. ուսումնական տարվա վերաբացման հանդիսությունը:

Նախագահական սեղանի շուրջ հոգևոր ճեմարանի վերատեսուչ սրբազան հոր կողքին տեղ էին գրավել Մայր տաճարի լուսարարապետ Տ. Հուսիկ արքեպիսկոպոս Սանթրույանը և հոգևոր ճեմարանի տեսուչ Տ. Անանիա եպիսկոպոս Արաբաջյանը:

Հոգևոր ճեմարանի նոր ուսումնական տարեշրջանի բացման հանդիսությանը ներկա էին Մայր Աթոռի միարանությունը, հոգևոր ճեմարանի դասախոսական կազմը, Մայրավանքի պաշտոնեությունը, մեծ թվով հյուրեր և ուսանողների ծնողներ:

Հանդիսությունը սկսվում է Տերունական աղոթքով: Այնուհետև հոգևոր ճեմարանի սաների կատարմամբ հնչում է Հայաստանի Հանրապետության հիմնը և Ծեմարանի քայլերգը: Որից հետո երաժշտության դասախոս Խորեն Պալյանի ղեկավարությամբ սաները կատարում են Ս. Մեսրոպ Մաշտոց վարդապետի «Լոյս փառաց» և Ներսես Ծնորհալի Հայրապետի «Հայրատունկ Այգույն» հոգեպարար շարականները: Ապա հոգևոր ճեմարանի դաստիարակ Տիրայր քահանա Գրլընյանը Ս. Ավետարանից ընթերցում է «Սերմնացանի առակը», (Մտթ. ԺԳ 4—9): Ընթերցումից հետո ուսումնական տարեշրջանի բացման խոսքով հանդես է գալիս ճեմարանի տեսուչ Տ. Անանիա եպիսկոպոս Արաբաջյանը: Սրբազան հայրը ուրախությամբ նշում է, որ վերաբացվող տարվա հետ նոր հույսեր ու սպասելիքներ ենք ունենում, որ գալիք սերունդը ևս եկեղեցանվեր ոգով ու մտավոր կարողությամբ պիտի կարողանա բավարարել մեր ժողովրդի հոգևոր պահանջները ի Հայաստան և ի սփյուռն աշխարհի: Որից հետո Անանիա սրբա-

զանը ներկայացնում է տեսչությանը և դասախոսական կազմին, որ հոգևոր և մարմնական համալրվել է նոր դասախոսներով՝ հրավիրված այլ ուսումնական հաստատություններից:

Շարունակելով խոսքը, ճեմարանի տեսուչն իր երախտագիտությունն է հայտնում Վեհափառ Հայրապետին՝ դեպի ճեմարանն ունեցած նրա հայրական ջերմ հոգատարության համար:

Սրբզան հոր խոսքից հետո «Դ» լսարանի սան Գեղամ Մսրտիրոսյանն արտասանում է մի հատված Ս. Գրիգոր Նարեկացու «Մատենան ողբերգություն»-ից: Այնուհետև երգչախմբի կատարմամբ հնչում է «Յաղթող» և «Էջ Միածինն ի Հօրէ» շարականները:

Վերջում Անանիա սրբազանը հրավիրում է հոգևոր ճեմարանի վերատեսուչ Ներսես արքեպիսկոպոսին իր օրհնությունների բաշխելու ուսանողներին և ներկաներին:

Սրբազան հայրը իր հայրական ողջույններն ու բարի մաղթանքներն է բերում հոգևոր ճեմարանի դասախոսական կազմին և ուսանողությանը:

Վերատեսուչ սրբազանը սրտի բերկրանքով է խոսում այն իրողության մասին, որ համայն հայության ազգային և հոգևոր վերազարթոնքի այս պայմաններում, Հայաստանյայց Առաքելական Սուրբ Եկեղեցու գործունեության համար մի աննկարագրելի լայն ասպարեզ է բացվել: Մեր ժողովրդի զավակները, վերադառնալով իրենց հայրերի արմատներին, մեծ խանդավառությամբ ու ոգևորությամբ են վերաբերվում մեր ազգային հոգևոր ու մշակութային արժեքներին: Իր խոսքն ուղղելով սաներին, մասնավորապես նշում է, որ ճեմարանի ուսանողները իրենց մտավոր և իմացական մակարդակով զարգացած և պատրաստ լինեն իրենց ուսերին կրելու մեր ժողովրդի ճակատագիրը, սերտեն մեր մատենագրության բազմադարյան ժառանգությունը, միշտ ամուր, անշարժ պահեն Մեր Սուրբ Եկեղեցին, Մայր Աթոռ Սուրբ Էջմիածինը և Մայր Հայրենիքը:

Հոգևոր ճեմարանի սույն հանդիսությունն ավարտվում է «Հայր մեր»-ի խմբովին երգեցողությամբ և Ներսես արքեպիսկոպոսի «Պահպանիչ»-ով:

